



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim TAPAK 3



Japan PM Kishida-i election akokba osang sangdongogo



Mizoram CIC Lalnunmawia Chuaungo-i tenangzüktepagiogo

VOL. XIX NO. 25 (ADOK 25) DIMAPUR SANGTENNÜ (TUESDAY) YIMPOKSÜI (NOVEMBER) 02, 2021 ₹ 5.00

## RPP-i H & FW Department aitsür

**Dimapur, November 1, 2021 (TYO):** Nagaland sorkari Health & Family Welfare Department nung staff peria maliba atema teinyaktsü meinyak saka iba onük atema Rising People's Party (RPP) dak tai tongloksüba jimenünüsüka lir ta RPP-i ashi.

March 24, 2020 nü India sorkari anogo 21 atema linük ajunga lockdown asütsü tetuyuba agütsü. April 22, 2020 nü Nagaland sorkari Office Memorandum (OM) ka nung "tanga tetuyubatem magütsü tashi sorkar Department ajak nung mapa tazüngtem dena nisung tasen meshimoktsü" ta metetdakja liasü.

Iba tenokdangba nung Health & Family Welfare Department indang medical staff (Doctors, Nurses, Technicians, and Para-medics) madener ta sorkarisa ashi. Iba sangdong agütsüba sülen küm ka ser tesadang ka süiogo anungji H&FW department nung staff peria mali süra

kechiba H&FWD-i nisungtem shimoktsü asoshi mapa meinyak, ta RPP-i metetdaktüsü.

RPP dak tai metongloksüsi 'shirnoki NSSB tentetstü menudaktüsür aser department tem nung staff meperi timtemdaktüsür?' ta bushisüng dangtsüla. NSSB Regulation 2020 agizükaka tang tashi nung NSSB tenteta moutetba ya Chief Minister ajanga lir, ta RPP-isa ashi.

H&FW department-i senotsü peria manguba ashira saka iba ya department-i sen timi mamshiba kulu agütsüsür ama lir. Department-i sen timi dang amshio go ta süra expenditure lists tejangja agütsüsüla, kechiyong 2020-22 atema COVID dak sendakba nung Rs.245.44 crore den LAPD funds nungi 25% amshiadokogo. Chief Minister aser Health Minister nati sen koma amshiar telangzüba agütsüsüla, ta RPP-isa metetdaktüsü.

## COVID-19 Nagaland: 17 dak putet & 10 taneptsü angu

**Kohima, November 1, 2021 (TYO):** Hombarnü Nagaland nung nisung 17 dak COVID-19 putet aser 10 taneptsü angu.

"Tanü putetertemji Dimapur nung 7, Tuensang nung 4, Mokochung nung 3, Kohima nung 2 aser Kiphire nung 1 liasü" ta Integrated Disease Surveillance Project atema State Nodal Officer, Dr Nyanthang Kikon-i ashi.

Tesüiba ghonda 24 tsüngda Covid-19 puteta alir nisung 10 taneptsü angu. Parnokji Dimapur nung 8 aser Phek o Tuensang nung kaka (1) lir, ta paisa ashi.

Nisung 31,859 rongnungi 29,914 taneptsü nguogo aser ibaji taneptsü angur 93.87% lir, ta Dr Kikon-isa ashi.

Tang nisung 216 anepaludar

saka parnok 173 dakbo shirangba yimya kecha mali, ta paisa ashi.

"Deobar tashi nung nisung 710,890 nem COVID-19 vaccine indang dose 12,02,662 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,961, healthcare workers 15,998, arishi küm 45 ser tempur 202,348 aser arishi küm 18 nungi 44 tsüngda alir 431,583 lir, ta paisa ashi.

Vaccine agirtem rongnung nisung 491,732-i dose anaprong agiogo. Parnokji frontline workers 47,989, healthcare workers 13,378, arishi küm 45 ser tempur 161,470 aser arishi küm 18 nungi 44 tsüngda alir 268,895 lir, ta Dr Thurr-isa metetdaktüsü.

## Commercial LPG cylinder nung Rs 266 tuogo

**Guwahati, November 1, 2021 (Agencies):** Linük nung petrol aser diesel jenjang atuba sülen totzü company temi commercial Liquefied Petroleum Gas (LPG) cylinder ka nung Rs 266 tuogo.

Iba ajanga Delhi nung commercial LPG cylinder ka indang jenjang Rs 2000 adenogo aser tang nungi Rs 2000.50 agi ayoktsü.

Taoba mapang 19kg cylinder kaji Rs 1733 agi yoka liasü.

Mumbai nung 19 kg cylinder ka indang jenjang Rs 1950, Kolkata

nung Rs 2073.50 aser Chennai nung Rs 2133 lir.

Ajisüaka, domestic LPG cylinder indang jenjangbo kasa dang asütsü.

Delhi nung non-subsidized gas cylinder (14.2kg) indang jenjangji Rs 899.50 lir.

October 6, 2021 nü domestic LPG cylinder ka nung Rs 15 ajungketa liasü.

Hombarnü anogo trok atongtepa petrol aser diesel jenjang tuogo.

## China-i telungpur teloktem ajanga Northeast nung tensa raksatsür: HYCP

**North Lakhimpur, November 1, 2021 (Agencies):** China-i Assam aser Northeast nung mepetmesü adokdaktüsü atema telungpur teloktem yarir ta Hindu Yuva Chatra Parishad (HYCP), Asom-i ashi.

India-i foreign policy shitak mayuba ajanga China-i Sri Lanka, Nepal, Bangladesh, Myanmar aser Bhutan nung tashi itshio go, ta HYCP president Balen Baishya-i ashi.

China-i Bhutan mesüka India aser Bhutan tsüngda tesentaktep raksatsüogo ta paisa ashi.

"Bhutan-i India nungi

nisungtem kiojen yangluba mapa inyaktüsü atema anir aoer saka Covid-19 wara tentung amer tanga India sensotem marudaktüsü" ta Baishya-isa metetdaktüsü.

India-i Taiwan pusemba ajanga China-i Bhutan ajanga Northeast nung tensa raksatsüsü meranger ta HYCP tanishirisa metetdaktüsü.

Assam nungi telungpur telok aika aser leftist lennir o shisashirtem den ano küm aika Assam nung sorkar yimsü asüba all-India political party kati China nungger tasa den yariteper, ta Baishya-isa tai tongloksü.

## Mangkolemba nung tensa mejungi aküm



Mangkolemba nung alirtemi gari lenmang yanglushitsü takangba agüja longkak aitba noksa nung angur. (Mangolemba, Nov. 01, 2021)

**Dimapur, November 1, 2021 (TYO):** Mangkolemba nung alirtemi gari lenmang yanglushitsü akhangba ama Nagaland sorkari meinyakba atema tanü lungkak aitba sentong ka agidang mepetmesü tensa ka atalokogo.

November 1, 2021 nü Mangkolemba nung alirtemi sorkar nem takhangba agütsüba nenshia sentong ka agi saka iba mapang ADC-i tim masüba olen ka jembiba ajanga nisungtem ain adokdaktüsü.

## Election Commission-i 'victory procession' memelar; Tanü votes azüngtsü

**Guwahati/New Delhi, November 1, 2021 (Agencies):** Election Commission of India (ECI)-i by-election agiba state aser union territory (UT) nung Chief Electoral Officer (CEO) dang votes azüngba sülen takok anguba lokti sentong magütsü tetuyuba agütsüogo.

"Votes azüngba sülen victory procession agütsü memelar" ta ECI-i CEO tem dang ashi.

"By-election nung takok anguba candidate-i Returning Officer nungi certificate of election agizükba mapang, nisung na den teimba arutsü memelatsü" ta EC-isa ashi.

October 30, 2021 nü Madhya Pradesh, Himachal Pradesh, Andhra Pradesh, Assam, Bihar,

Tanü lungkak aitertemi sorkar dang jashiba sayua PWD (Roads and Bridges) divisional office shibangtsü aser iba sülen ADC den ajuruteptsü atema ao. Idangji ADC-i election mapang sen yong votes yokdokba indang olen ka ashiba ajanga lungkak aitertem jashidaktüsü.

Lungkak aitertemi tejashi nung office telungi nungpoka atutsü merandang ADC indang personal security officer-i anünglen injang khatok saka iba

jagi nisungtem taliba ain adokdaktüsü.

Tatem nung Mangkolemba division nung civil society organisations (CSOs) lennirtemi tensa süngiemdaktüsü aser ADC-ia pai jembiba olen meyipa agia tatok meshi.

September 26 nü Mangkolemba nung CSOs-i state sorkar dang October 31, 2021 tashi nung Mangkolemba-Longnak lenmang yanglutsü atema mapang atakzükja liasü.

Haryana, Karnataka, Maharashtra, Meghalaya, Mizoram, Rajasthan, Telangana, West Bengal aser UT of Dadra & Nagar Haveli aser Daman & Diu nung by-election agia liasü.

Mongulbarnü (November 3) Lok Sabha constituency 3 aser assembly constituency 29 nung by-election agiba indang votes azüngtsü.

Lok Sabha constituency temji Madhya Pradesh kübok Khandwa, Himachal Pradesh kübok Mandi aser Dadra and Nagar Haveli lir. Constituency asemprong nung MP tem asüba ajanga by-election agütsüsa aküm.

Assembly by-election temji Assam nung menden 5, West

Bengal nung 4, Madhya Pradesh, Himachal Pradesh o Meghalaya nung asemsem (3), Bihar, Karnataka o Rajasthan nung anana (2) aser Andhra Pradesh, Haryana, Maharashtra, Mizoram aser Telangana nung kaka (1) lir.

October 30 nü Nagaland kübok Shamator-Chessore assembly constituency nung by-election agütsüba liasü saka October 13 nü Nationalist Democratic Progressive Party (NDPP) candidate den tetokteper shinga melii takok ngua liasü.

Assembly menden 29 nungi Bharatiya Janata Party (BJP)-i tesadang ka nung, Congress-i 9 aser tantungbatemji regional party temi takok ngua liasü.

## 2020 National Sports Awards angur nem sempet agütsü

**New Delhi, November 1, 2021 (Agencies):** Hombarnü Delhi nung aliba Ashoka Hotel nung Sports Ministry-i yaküm National Sports Awards angurtem nem takok maroktem agütsüogo.

National Sports Awards 2020 takok angur ajaki 'cash awards' agizükogo saka COVID-19 wara takok marok aser kulikakettem magizükte.

August 29, 2020 nü Sports Ministry-i National Sports Awards 74 tashi agüja liasü. Iba nung Rajiv Gandhi Khel Ratnas 5 aser Arjuna Awards 27 dena lir.

Hombarnü Delhi nung agiba

sentong nung women's hockey captain Rani Rampal, wrestler Vinesh Phogat aser 2016 Paralympics gold winner Thangavelu Mariyappan nungger aden.

Sentong nungsa Tokyo Olympics bronze medallist boxer Lovlina Borgohain, cricketer Ishant Sharma, sprinter Dutee Chand, archer Atanu Das aser shuttlers Satwik Sairaj Rankireddy o Chirag Chandrasekhar Shetty nungger aden.

"Saisapongertemi küm aika bendanga agütsüba aser merangba sülen ang National Sports Award angur. Takok angur ajak nem tenüngsang

agütsür aser tarutsü nung takok angutsü moatsür" ta Union Sports Minister Anurag Thakur-i ashi.

"Asenoki maneni saisaponger tajungtem jangjatsüla, parnok anitetsüla aser international level nung takok angutsü atema sayutsüla. Anungji ni saisaponger shia dang tarutsü nung India atema medal bentsür arutsüpur saisaponger pungu danga anitetsü mepishir" ta Anurag Thakur-isa metetdaktüsü.

Iba sentong nung Sports Secretary Sujata Chaturvedi, Youth Affairs Secretary Usha Sharma aser ministry o SAI ketdangsurtem aden.

# Jalukie nung Nsim Ngi benjong mungogo



Nzaunalui Union Jalukie Valley puri Tumda Newme Compound, Jalukie Pungchi nung October 30, 2021 nü 'Nsim Ngi' benjong munga liasü, Iba sentong NLA züngsem aser taoba Chief Minister, T.R. Zeliang-i tesemdanger tongti o jembiba noksa nung angur.

**Dimapur, Yimpoksüi/Nov. 01 (TYO):** Nzaunalui Union Jalukie Valley puri Tumda Newme Compound, Jalukie Pungchi nung October 30, 2021 nü 'Nsim Ngi' benjong munga liasü, kong Nagaland Legislative Assembly züngsem aser taoba Chief Minister, T.R. Zeliang tesemdanger tongti ka ama dena liasü.

Iba sentong nung T.R. Zeliang-i jembiba mapang Nzaunalui Union Jalukie Valley ajanga Nsim Ngi benjong ayongzüktetba atema tenüngsang agüja liasü.

State tezülen Assam aser Manipur den arütsü sür rongsenketzüng nung tetsükdaktsü jenti liaka Nzauna yimtsüng nung alirtem sobaliba tsütsü tasüngtet aser lokti meima alir, ta pai ashi.

Pai Zeliangrong kin indang sübosolemtsü, azük-naro, Hornbill aser Amur Falcon

tsüngsang indang jembiba liasü. Tamangba yimsü aser sobaliba ya ka ama memeyokteptsüla, aser sobaliba dak sendakba inyaksangshi tajunglen nungi amshitsüla, ta T.R. Zeliang-isa ayongzüka liasü.

Zeme Council Nagaland indang tir Dr. Tumda Newme-i iba sentong nung jembiba mapang sobaliba aser yimsüyimpong wazüka ayutsü indang ashi. Pai Zeliangrong tsüngsang aser ken nung temolung agütsütsü indanga jembiba liasü, koba tebour tajung libajen nung ajemdaker lir, ta ashi.

Iba sentong ya R. Andrew Disong aser Kidwayile Disong nati ani, aser Nangkamlak Pame ajanga temeja ken ka tena liasü. Sentong nung Chairman NUJV, Haipham Pame ajanga tarur pela agizükba o jembi aser vice chairman NUJV, Shilu-i melepzüng o jembiba liasü.

Iba benjongmung nung NUJV ajanga Herie lim (Hornbill Dance), Awoi lim (Amur Falcon Dance) aser Rehoi lim (Howling Dance) tsüngsanga liasü.

Sobaliba tsüngsang dak alaka ano Nra Zube (Single string Violin) aser Ntiam Mmutbe (Flute) amala Haiguatung Newme aser Dirua Disuang nati sayua liasü.

Nsim Ngi benjongmung ya Zeme nung benjong tongtipangtiba lir, koba October ita tatemlen aser November ita tetenzüklen amunger.

Iba benjong mapang Upper aser Lower Morung tem nungi teburtemi ali lenmang müreker.

Zeme nung iba dang 'Kepheu pualu Lamdi Simbe' ta ajar.

Ibai tsürabur aser kibong kumer aliba chirnurtem, adianu aser adianutsür, kinungertem tsüngta tesendaktep yanglushiba benjong ka lir.

# Royal Club Kohima pur 34 buba Foundation Day mungogo



**Kohima, Yimpoksüi/Nov. 01 (TYO):** State nung dangar asoshi mapa tajung inyaksüba lokti tentet tejentiba rongnung ka, Royal Club Kohima (RCK) pur 34 buba Foundation Day, Hombarnü Jakhama nung mungogo.

Iba club nung züngsemtem den tajungshi o jembiba mapang retired DGP Nagaland aser taoba mapang RCJ tir inyaka alisang K Kire-i club indang omen "Service to all" nung ajemdaker jembiba liasü.

State nung football asaya temaba jenjangi ajungkettsü

nükjidong nung club ajanga Royal Gold Cup ayongzüka arur, koba All India Football Federation nung züngoka lir, ta pai ashi.

Kohima nung club tejentiba rongnung ka asünung, state sorkari nungloksüba maparen, talisa nübur asoshi mapa tajung inyakba maparen balala nung shilem agia arur, ta pai ashi.

Züngsem tejentem anisüngzüker asünung lanurtemi tongi shilem agia club ya kibong ka ama tejakleni anir aotsüla, ta Kire-i ashi.

Sentong nung tir tenüng nung

jembiba mapang Ken Keditsu-i 2019 küm inter school football tournament ayongzüka, CM Relief Fund nung tenla agütsüba aser 2019-2021 tsüngta club ajanga maparen balala inyakba indang lemsatepa liasü.

Iba sentong nung Khrietseituo Tungoe aser Viechühu Liezietsu nati tongti zülur osang aser kimen osang agüja liasü.

Iba sentong nung Neiba Nakhro menden liasü, Thejao Vihienuo-i sentong tenzüka sarasadem aser Ahelie Keyho-i melepzüng o jembiba liasü

# Mokokchung nung COVID-19 agi asür atema metetdaksür

**Dimapur, Yimpoksüi/Nov. 01 (TYO):** District nung COVID-19 agi asüba nisung shia kinunger nem District Disaster Management Authority (DDMA)-i Direct Benefit Transfer procedures ajanga sen 50,000 Ex-Gratia agütsütsü, ta Deputy Commissioner aser District Disaster Management Authority (DDMA) Chairman Mokokchung, Limawapang Jamir-i sangdong ka nung metetdaksü.

Anungji iba Ex-Gratia agizüktsü atema asür kinungertemi DDMA Cell, DC Office Mokokchung nung tsünglanglen agüja aliba kuli kaket tem agütsütsüla.

1. Application Form (Annexure-A),
2. Death Certificate,
3. Mozüki koba nung asü, iba mozüki nungi Certificate (Kechi agi asü, ibaji ashitsüla),
4. Temeshir indang Passport

5. Temeshir indang Aadhaar Card,
6. Temeshir indang Bank Account tejangja.

Iba Ex-Gratia teyari ya linük nung COVID-19 cases mezüngbuba putetba anogo nungi COVID-19 ya 'disaster' ka masü ta mesangdong tashi mesüra tarutsü nung osang ka mesangdong tashi, koba tekeraba südir, iba tashiji agütsütsü, ta sangdong ajangasa ashi.

# DIPRajanga K.K. Peseyie asükhu lemsatep

**Dimapur, Yimpoksüi/Nov. 01 (TYO):** Information & Public Relations Department nung taoba mapang Director inyaka alisang K.K. Peseyie mapang talangka shiranga arur October 31, 2021 nü asüba osang angashia Directorate of Information & Public Relations nung ketdangsur aser staff temi asükhu lemsateper, ta sangdong ka ajanga ashi.

Director IPR, Z Tokishe Sema-i sangdong ka ajanga ashiba agi, Asür K.K. Peseyie ya Information Officer ka ama DIPR nung mapa inyaka tenzüker aser meilongi 1983 nungi 1991 tashi Director ama inyaka liasü.

Pa Director menden nungi anisüngzüker küm 30 tashi liogo. Pa ya sorkar tenzüker tetemjen aser lenir tajung ka ama DIPR staff temi bilemteter aser züngshir, ta sangdong ajanga ashi.

Pai ochi nung Department tenzüker, aser pai Tsüngrem meimba yimya ya pai sorkar tenzüker tajung ka ama aliba nungi ajitetter.

Pa kübok inyaker staff tem atema pai teti bilemja liasü aser staff temi pei mapa tajungtiba nung inyaktetsüsa pai len sayua

liasü. Pa dak taremsükba molungsentü den külem tenzüker asoshi bilemetsüba teti bilemtetsü, ta sangdong ajanga ashi.

K.K. Peseyie ya lemle-lemlar ka liasü, shiba ajaki kanga akumtsüba aser züngshia liasü. Pai ajak den yimya tajung agi liogo, aser pa lenisüba kübok nübur aser sorkar tenzüker nung Department-i mera tajung agia liasü.

Pa nükla tajung akaba lenir ka liasü, shiba bendanga agütsür temolung ajanga agi department tenzüker. Pa asüba ya nüburtem aser Department atema takoksa tulu alitsü, aser pai shilem tajung agiba teti bilemtetsü.

K.K. Peseyie ya kaketshir lenir ka liasü aser pai lanuwa mapang kaketshir lokti tentet nunga shilem tajung agia liasü. Pa ya shisanü ka amai liasü aser state inyakyim nung teti zülua liasü.

Asür K.K. Peseyie'er kinunger mangyim tejashi nung aliba mapang Department nungi staff temi asükhu lemateper aser Tsüngremi mangyimer nem tashi tasen aser molungzüngzüker agüjang ta sarasademtsür, ta sangdong ajangasa ashi

# Sechü-Zubza Flower festival tenzüker



Sechü-Zubza ajanga süyiba NH 29 nung November 1, 2021 nü tenzüker Flower festival noksa nung angur. Iba benjongmung ya December 20, 2021 tashi alitsü.

**Dimapur, Yimpoksüi/Nov. 01 (TYO):** Sechu-Zubza Youth Organization (SZYO) ajanga NH 29 lenmang tezülen November 1, 2021 nungi December 20, 2021 tashi nung benjong (flower festival) ka ayongzüktetsü.

Iba tesem nung alirtem indang nung aser danga osettem sayua aser ayoktsü atema sapang agütsütsü mechi iba benjongmung ya ayongzüker alitsü. Sechu-

Zubza aser temeket nung tzü-mopung ajungba ajanga tsünüsempontsü aser nung densema süngjang-lijang tabu balala adoker.

Iba benjongmung mapang senotsü ajangetetba ajanga yimtaklirtemi ano nung tsünüba nung temolung agütsütsü aser iba benjong ya ajanga yimtsüng nung rongsenketzüng jungdaktsütsü SZYO teimla lir, ta sangdong ka ajanga ashi.



ADC Dimapur Atokhe Aye ajanga November 1, 2021 nü Deputy Commissioner, Dimapur indang office nung political party ka nungi züngsem ka nem Draft Electoral Roll amoktsüba mapang tangokba noksa nung angur. Dimapur District kübok Assembly Constituency pungo prong atema Draft Electoral Roll ya Registration of Electors Rules, 1960 nung aliba ama renemogo aser DC Dimapur indang office nung office lapokba mapang arua repringtetsü akok.

### Mizoram CIC Lalnunmawia Chuaungo-i tenangzüktep agiogo



Lalnunmawia Chuaungo (File photo)

**Aizawl, November 1, 2021 (Agencies):** Hombarnü Chief Minister Zoramthanga-i Lalnunmawia Chuaungo, IAS (Rtd.) nem Chief Information

State sorkari tawa tu Lalnunmawia Chuaungoya Chief Information Commissioner, Mizoram State Information Commission (MSIC) inyaksü shima liasü.

Chuaungoya March 1, 1962 nü aso aser Gujarat cadre kübok 1987 küm Indian Administrative Service (IAS) ketdangsür ka aküm.

2019 nung inter-cadre deputation nung pa Mizoram Chief Secretary inyaksü shim aser taoba hopta pai voluntary retirement agiba tashi iba mapa inyaka aruogo.

### Darrang indang mezüing 'drug de-addiction centre' lapokogo

**Mangaldai, November 01, 2021 (Agencies):** Darrang superintendent of police Sushanta Biswa Sarma-i Mangaldai indang Ward No-6 kübok Karimchowka nung drug de-addiction centre ka lapoktsüogo.

Assam indang Darrang district nung iba drug de-addiction centre ya mezüing asütsü.

Deobarnü iba centre lapokba sentong nung Darrang superintendent of police Sarma-i, iba district nung lanurtem tsüngda temesepba mozü

achirtem kanga bulua akümer asünung, medical aser lokti atema iba centre kanga tongtibang asütsü, ta ashi.

Iba Centre mapa kuma achaayangba ajanga medical takotet akhüm nung temesepba mozü achirtem nem medical teyari agütsütsü asoshi nungittsü imlar, ta Sarma-isa ashi.

'Ruhani' ta nüngja agütsür lapokba centre ajanga temesepba mozü achir, yi ajemertem aser tekolok meshidak alirtem nem medical facility agüja yaritsü nükjidong lir.

Iba centre ajanga lokti nung sensaker kibongtem, shirnok senotsü peria mali parnok nüngdaka ajiteta yaritsü imlar, ta Neuropsychiatrist aser de-addiction specialist, Dr Iftikar Hussain-i ashi.

Dr Iftikar Hussain-i pa kinungtsü Dr Sujata Borkakoty, shiba pa ama Neuropsychiatrist ka lir, la teyari agia iba centre amenok.

Iba centre lapokba sentong nung, Mangaldai police station indang officer-in-charge, Inspector Mosco Saikia aser tangartem aruagi denogo.

### Nüngtugu journalist Barun Dasgupta alima nungi pilaogo

**Guwahati, November 1, 2021 (Agencies):** Nüngtugu journalist Barun Dasgupta Deobar anepdang Kolkata nung mozüki ka nung asü. Pa arishi küm 86 liasü.

Dasgupta kinungtsü aser sangro zülur Ruchira Shyam asüba sülen tesüiba küm pungo tashi Salt Lake kübok journalists' cooperative housing complex nung pa kija lia aru.

Barun Dasgupta ya Sodepur indang Gandhi Ashram nung intet. Tebu Kshitish Dasgupta aser pa

tebu tambu Satish Dasgupta nati iba Ashram lapoka liasü.

Barun ya Bengali, Assamese, Hindi aser English oshi jembir takotet ka liasü.

Pai osangkaket aika nung inyakogo. Guwahati nung The Hindu indang special correspondent ama inyakdang pai mapa nungi anen.

Osangbener takotet ka ama Barun Dasgupta-i Patna, New Delhi, Kolkata aser Guwahati nung inyakogo.

Iba den külemi küm aika atema Dasgupta-i Indian Journalists' Association nung

züngsem tajung ka ama liogo.

Taoba mapang journalist Barun Dasgupta asüba osang angashia Gauhati Press Club (GPC)-i mangyim jashi lemsatepogo.

Küm aika iba wadang nung inyaka aruba mapang Assam densema North East indang tebilemstü onük balala nung Dasgupta-i osang yangluogo, GPC-i ashi.

Dasgupta iba akümli nungi pila aoba ajanga journalism wadang nung ongdang tuluka adokdaktüogo, ta GPC-isa shisem.

### Mamata Banerjee-i December ita Tripura semdangtsü

**Agartala, November 1, 2021 (Agencies):** West Bengal chief minister aser Trinamool Congress (TMC) tanishir Mamata Banerjee-i December ita Tripura semdangtsü.

Iba osang ya TMC national general secretary Abhishek Banerjee-i metetdaktüsü.

"Mamata Banerjee-i December ita Tripura semdangtsü. Lai Agartala nung aliba Vivekananda Ground nung lokti sentong ka nung jembitsü" ta Abhishek Banerjee-i ashi.

Abhishek Banerjee-i Deobarnü Agartala semdang aser mezüingbuba public rally nung jembia liasü.

Tripura nung Biplab Deb-i aniba BJP sorkari tim mesüi inyaker. Onoki BJP tashiyim sorkar anema raratsü aser

takok angutsü, ta pai ashi.

TMC national general secretary Abhishek Banerjee-i Tripura tanen makai semdangba atema BJP-i Trinamool Congress (TMC) aitsüogo.

Abhishek Banerjee-i aiben Tripura semdangba ajanga TMC-i timtem nung aliba sayur, BJP-i ashi.

TMC-i national party ka ama sayutsü atema kanga meranger. Deobarnü Agartala nung TMC sentong nung adener teimba ka West Bengal nungi anir aruba liasü, ta BJP-isa metetdaktüsü.

"TMC-i Tripura aser Goa ama state tem nung mapa inyaknür. Saka item state nung alirtemi parnok tebilemba meteta lir" ta Tripura BJP president Sukanta Majumdar-i ashi.

### Meghalaya police-i Nigeria nunger aser Naga tsür ka apu



**Guwahati, November 1, 2021 (Agencies):** Meghalaya police-i cyber-fraud ken o ka atema Delhi nung Nigeria nunger ka aser Naga tsür ka puogo.

East Garo Hills district nungi police teloki Delhi Police teyari agia Deobarnü Tilak Nagar nung tena apu.

East Garo Hills district kübok Williamnagar police station nung Rs 2 lakh cyber fraud ken

o benokba dak sendakba nung tena apu ta osang angazükter.

Nigeria nunger ya Felix ta jangjaogo.

Tena ket nungi mobile phone 11 aser ATM cards 18 tashi ngutetogo, ta police ketdangsür kati ashi.

Tena transit remand atema Delhi nung Tis Hazari Court-i anir ao aser Meghalaya-i anir aruba sülen asüingdangyatsü, ta ketdangsürisa ashi.

### Mizoram nung nisung 165 dak Covid putet; 1 asü

**Aizawl, November 1, 2021 (Agencies):** Hombarnü Mizoram nung Covid-19 puteter ajak agi nisung 1,21,524 jungogo. Tesüiba ghonda 24 nung nisung 165 dak Covid-19 puteta liasü.

Kasa mapang Covid-19 agi asür nisung 1 densema State

nung iba tesashi wara adoker külen nungi Covid-19 ajanga asür nisung 433 shi kümogo. State nung single-day positive rate ji shilem 7.49% liasü.

Tang Mizoram nung nisung 6,479 iba tashidak agi shirangdar aser Deobarnü nisung 412 taneptsü nguogo.

State nung Covid-19 nungi taneptsü angur nisung 1,14,612 lir.

Maneni Deobarnü information and public relations, Mizoram sangdong ka ajanga state nung COVID-19 nungi taneptsü angur shilem 94.28% asütsü ta shiogo.

**GOVERNMENT OF NAGALAND**  
**DIRECTORATE OF EMPLOYMENT, SKILL DEVELOPMENT & ENTREPRENEURSHIP**  
**NAGALAND, KOHIMA**  
**NOTIFICATION**

**Dated Kohima, the 1stNov'2021**

NO.DET-2/14/2001 (Pt-I):/609 It is hereby notified that regular classes/training for the New Academic session 2021-2022/23and 2nd Year Classes in all the Govt. Industrial Training Institutes (ITIs) will commence from 22nd November, 2022 as per Ministry's letter NO. DGT-12/1/2020-TC Dated 29th October, 2021.

In this regard, all the trainees are informed to report on the 22ndof November, 2022 at 9:00 A.Mto their respective Institute positively.

All training activities will be carried out as per the Standard Operating Procedure (SOP) as prescribed by the Ministry of Health & Family Welfare (MoHFW), Govt. of India.

Sd/-  
**CHIDEN YADEN**  
Director

Issued by DIPR

**DEBTS RECOVERY TRIBUNAL, GUWAHATI**  
**Government of India, Ministry of Finance**  
**Department of Financial Services (Banking Division)**  
**Suwarna Bhawan, House No. 12, New Town Path,**  
**G.S. Road, Ulubari, Guwahati- 781007**

**NOTICE OF DEMAND TO THE CERTIFICATE DEBTOR(S)**  
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

**RC/ No. 3274 / 2019**  
**Bank of Baroda (Erstwhile Vijaya Bank) Dimapur Branch**  
-Vs-  
**M/s. Jnitis Automobiles & Ors.**

To,

- M/s. Jnitis Automobiles**  
Proprietor Alugang Pamei, W/o Mr. Agies Prasad, Duncan Road, Thongo Enclave, P.O. & P.S.- Duncan, Dimapur, Nagaland, PIN- 797113.
- Mr. Agoes Prasad**  
S/o Late Kanahaiya Prasad, R/o H. No. 51, K. Sachu Colony, P.O. & P.S.- Duncan, Dimapur, Nagaland, PIN- 797112.
- Mr. Pradip Kamei**  
S/o Late K. Gaijanpou, R/o H. No. 52, K. Sachu Colony, P.O. & P.S.- Duncan, Dimapur, Nagaland, PIN- 797113.

This is to certify that a sum of **Rs. 2,13,53,257/- (Rupees Two Corers Thirteen Lakhs Fifty Three Thousand Two Hundred Fifty Seven only)** as per details given below has become due from you consequent to a Recovery Certificate issued by the Ld. Presiding Officer by an order dated 17-01-2019 in case No. O.A. 391/2018.

(1) Amount due as per the Recovery Certificate:	Rs. 1,90,64,196.00
(2) Interest from 30.06.2018 to 01.05.2019 @ 13.25%	Rs. 21,39,061.00
(3) Costs	Rs. 1,50,000.00
<b>TOTAL</b>	<b>Rs. 2,13,53,257.00</b>

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for  
(a) such interest as is payable in accordance with the recovery certificate RC/ No. 3274 / 2019 for the period commencing immediately after issue of recovery certificate to the date of realization, and  
(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

**GIVEN UNDER MY HAND AND SEAL ON 1<sup>ST</sup> DAY OF NOVEMBER, 2021.**  
**(S. KUMAR)**  
**RECOVERY OFFICER**



## TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜ (NOVEMBER) 02, 2021

### Samanir kin aser Khuret

**N**aga kintem rongnung Ao kin ya Samanir (Pioneers) kin ta jembiba ya shitak dang lir, kechiyong samanir tetezü tamapur, lenirtem rongnunga mezünpur, anungji Naga kintem madak Ao kin ya lenirtem madak lenir, walunir kin lir. Iba narokümji angati zübazübaa anguba jenjang ka masü saka asen otsüla oboula aser ojala obala nungertem kari tasüa majem, tetsübu tizükteta aser tatala arema tarutsü lanu putu asoshi Naga lima nung Tsüngrem yimli tenzüka yutsüba jenjang ka lir. Küm 150 jakdang, asen tsüraburtem mapang arür tsübuba agi pei lui aotsüa tsübua atidaka bilemba mapang, Ao lima nungbo Molungkimong nung Dr. Clark anioka Yisu temeim yimsü tasen agizükba nungi tenzüka tanü Nagaland ajak Khrista asoshi ta Naga nungertemi sangdongtetbaji, Ao lima nung aputetba Tsüngremer taochi milak jangruba agi Naga lima sangwaba mapa ka lir. Iba kasa tesangwa nung Dr. Clark kinungtsü Mary Mead-i anir Ao lima nungsa Molungyimsen nung kaketreju tenzüka Aotsür Aortem kaketshisatsü nung tashitemetetter küm daksüba agi, Naga lima ajunga nung kaketreju lapoka Naga nung shisa tenük lapokba mapatemji bilemdangra tesüngmangtsü ain nung Aori inyakba mapatem lir. Iba mapangbo gari olaa mangashidang, electricity tesangwa tenük agi mengudang, temang ajak ayima abensüoshia magitet mi agidang temang alemba mapang, sapon toztü amshia temang merüksü memetet, tasü mang ali nung aremtsü mapiteti kidang shizüka ayuba mapang, nisung o shiruru na libaliro mebendang aliba mapang, Yisu temeim yimsü agi alima nung yimjung aruba, long aser yong amshia anogo aser mapang asüksü melen zülutsü aser azüngtsü angazükba agi tashitemetet tepelaji pei kija agitsü dang mebilemi, tangar yimjung mali tetsübu nung alirtem aser memetet kintem danga ashitsü temulung animesüngzükteti bilema mulungtetba kin aser nübortemji, atangji, walunirtem lir. Joko, Naga nungertem rongnung Yisu temeim yimsü tajung agi yimjung yangluba mapatem den külem külemi kaketshisatsü angazük daksüba mapatem agi Naga kintem shisa tenük lapoktsür külenbo, Naga nung atema rongdak nungdakji lokti telongjem sabang ka alitsüla ta Aor lenirtemi apitet. Ibayongji, 1940 kümbo December 30 nü Ao Kaketshir Mungdang lokti senden nung Naga nung kaketshir telongjem ka tentetsü bangjem aser tamasa Mokochung nungang Naga Students' Union tentet. Iba Naga Students' Union lenirtemi anir 1947 küm October 29 nü Kohima nung Naga kintem nungi kaketshir lenirtem ayongtepa senden ka amenba senden nung All Naga Students' Federation tenzü. Iba jagiang, taküm Naga Students' Federation tenzüker küm 75 ajunger. Atangji, Naga yimten nüchiso atema mezüng Naga kin tenüng nung Simon Commission dangi Naga Club-i tezüluba agütsüba nung Ao kin nungi shinga tenünga mangur. Ajisüaka, iba sülenbo Ao kin nungi lenirtemi anir Naga yimten nüchiso asoshi jembia inyakba agiang, 1946 küm mezüng Naga yimten nüchiso asoshi jembitsü atema lokti senden lia tentetba Naga nung sabang, Naga National Council nung Ao kin nungi Wb.T. Aliba lmti tir ser tentetbaji tanü Naga yimten otsü lir. Iba nung jagi tenzüker, tanü Nagaland state akümba tashi ya Ao kin leniba nung Aor samanirtem nübo, rongsen aser Dr. Imkongliba taküm tenla agüja alangba otsütemji Naga nung yimten otsü lir. Iba jagi Ao kin dang Samanir kin ta ajar. Atangji, iba naroküm yabo asüküma kidang berem nung idaka ayutsüba konang ka masü, saka Naga nung asoshi peiang machi aser peiang magi aser peiang anisüngzüka kidang mamong, ano maneni ochi aser temeim agi nüken belema inyaksüba mapa aser khuret lir.

## OLEMSABANG

### Asen lima liner tajungji shirnok?

- S. Nuken Longkumer, Naga United, Dimapur

Ans: Shidakba political liner taküm kaji sobaliba metetba, sensaker tia metetba, aluyimer tia meteta aliba liner tajung tanü putu den tapet lir, ibaji alimai angateta aruogo? Joko tematiba jenjang nung jembiteter masü, teküpokba jenjang den alua sensaksem akaba timtem ajak angateta inyakba aser ochi den litetba political liner asütsüla (or) shimtetsüla? Yamaji mesüra alima ya tesüleni anitsü, aser nupur taküm aika tesama tia ajurutsü mapang yakta arutsü? Political liner ta sürapang nutsung nupurtemi mulunga shimtetba dang ajar! Paji asenok peon ama asütsüla nupurtem aria bilemtsüba taküm ka asütsüla! Iba yongji tanü sen agi alizüka adokdaksüba linerji majung repringang parnoki koma yimsü asür! Par den ajurutepa otzü jembitsü lemanng kecha mali, pai mulungba ama inyaker! Nupurtemi ashiba mangar, meinyaker, ya asen tai lir! ano mapang tajungbo arutsü lingo! Saka asenokbo tepok masüngtsü, alimajibosa telungi alutsü! Küm pungu (5 years) süia aodangbo tangarbo asen ama mejanga malitsü aritepa tejaklini wadoker atatsü? Anungji shisa taka linirtem ama jajatsü inyaksü anogo tongogo! Asen Aolima koda renloka aor repringang, asatepa paper mill samadaksüogo? Tenükmerem ya alima matem tashi alitsü tanü political linerji R.C.C tamasa meyangluba mebelemba nupu asütsüla car tasen alia mamshiba liner masütsüla, asüküma jajaba taküm masütsüla asenoki taoba mapang Bihar Chief Minister Mr. Laluo taküm bilemteta lesson tajung agitsüla! Assam lima nung tanü tashi Minister aser MLA temji repringa ora lesson tajung aika angutsü! tangar tashitemeteter lima inyakba jembiba item mapa tajung ajizüka inyaksü mapang tajung aika lir? Tangar limai asen mapa aser asen sendong ajak angateta arudar! Rongsen dang magutsü yutsüra asen lima kodanga tejaklini maotsü ta meteta kümogo! Parnok tepelemba ajak amajok akümtsü taangateta aruogo asenoki jembiba ajak tzüim tarok nung yutsütsü parnok tepelemba lir, ibaji asenoki jungjunga angatetsüla? Centre nung aliba Govt. den teka amteper asen lima yanglua dokang, iba sülen rara adokyonga aseni akoktsü! Par yimsütsüba küpok asenok yamai timtema malitsü! Kanga junga shisadangra tangar lima nungi (rice) jang ya meyok nungbo koda asütsü? anungji Naga nung tanü teinyaksü mapa tulu anunga lir! sobutsü tajung car tajung tangar lima nungi aruba amshtepa alibaji tatempang masütsü jembia aonung temenungratsü aser tetsübuttsü mapa aika angutsü?? car lemanng jungjunga yanglutetra Naga nung aika takar akümtsü.

O tatempang! 1969 küm America nung Dr. Armstrongi Ita nung jajaba ya tesüngmangtsü rongnung tesüngmangtsü tulu liasü, saka asenokbo ali nung car jajatsü atema meyanglutetba ya tesüngmangtsü rongnung tena lir?,

### Lemang yangluang ochi jungkai adoktsü ?

S. Nuken Longkumer  
Naga United Village, Dimapur

Nagalima nung lemanng yangluang ta anogoshia ayimtener, saka mangashir ama dang yutsür tamajungba dang akümer ? Kanga junga bilemdangangjo ASSAM lima ajanga küm 70 shi timtem jendi ajurua Naga nungertem jaja aru? Anungji tang Foothill road atema anogoshi jembir, tenla balala aika agütsür aser iba lemanng nung jajatsü yongyateper. Saka lenirtemi mangashir aser par sünütsü asür ama repringer? Iba khuret atema tarutsü aliba election nung Naga nung ajaki ayimtentsüla!! Joko Nagaland nung opposition maka ya koda asütsü? tartür maka, joko shisalen sayur mali kuma aor?? district 7 nupurtem kechiba ola madoker, ya shir jajatsüba lemanng.

Küm kwika alar tia nung jaja-ogo?? Tang Naga lima ya amang temelem agi amokpanga ayuba ama tia ka nung lir, ya tesüngmangtsü otzü ka asütsü? Naga limaji Naga nungeri meimang!! Tanüa Naga nung asütsü, asünga Naga nungersa asütsü!! tanü iba tensa mapang sarasadem mungdang tuluka Kohima yimtiba nungji ayongzükangkoto, missionary lima ? Tsüngrem akümtsübur tamangertem!! Teraksa aika lir, item temenen aser tebilemtsü Naga nungeri nangzüketra teyanglur Tsüngremi langzüksü asen nüktzü sarasadem?? Joko foothill road yanglu dang Naga nung shingai timtem magutsütsüla, saka meyiper yaritsü tim lir, yamaji minyakba ajanga Naga lima paper mill, cement factory, sugar mill sama-ogo.

Shir meyong sama?? Foothill Road yakta renemjang tangarbo ita nung jajar alua lir?? Assam nung jajatsü lemanng masü, Naga nung lemanng atema jembir?? Naga nung atema jenjang tulutibaji Foothill Road ya asütsü saka Naga lima nung cari jajatsüsa meyanglutetbaji kechi tai ajanga mesüra shibai nokdanga alir mesüra rongsen maka asü? yamai asatener sür nung ola matoker, tenlatem nupur aser lokti balalai agütsür, ya shir jajatsüba indang jembir? Naga nung ajak asoshi iba lemanng ya kanga tongtipang lir ta nupur ajaki angatetsüla yamai atsütepdang Naga lima telungi alur ya shir teloki koktetsü, yakta Foothill Road yanglujangma??

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Modi-i Pope ajuruba atema India nunger Khristantem pelar



October 30, 2021 nü Vatican nung India Ato kilonser, Narendra Modi aser Pope Francis na ajuruteba tena tsungda sempet agutsütepang tangokba noksa nung angur.

**November 01, 2021:** Honibarnü Ato kilonser, Narendra Modi-i Vatican nung Pope Francis ajuruba atema India nung Khristantem aser lenirtemi pelaba lemsatepogo; lenir ana senden amenba mapang nung coronavirus wara, sensak tia, climate change aser yimjung onük densema tongtibang onük aika nung o lemtepa liasü.

Kerala Christian Forum nungi Kevin Mathew Sunny-i, Modi aser Pope na senden amenbaji pelaa agizüker, aser iba ya temaitsü tajung ka lir, ta ashi.

Pope-i India semdangra pai linük nung yimjung aser tesünep atema jembitsü asü, ta asungdangba langzudang Mathew Sunny-i, "Pai semdangra kanga ajungtsü; ibaji ajanga secular linük ka ama India-i yimsü aser nübur telemsa ajak agizüker ta sayutsü," ta ashi.

Church Act activist, Indulekha Joseph-i, lenir na senden amenbaji pelaa agizüker, kechiyong Pope Francis-i awa-a oa inyaker, ta ashi.

October 30, 2021 nü Modi aser Pope Francis na minute 20 shi dang ajurutsü sentong liasü saka tena ghonda ka jungnüa senden amen. Modi-isa Pope dang tekaraba nung India semdangdaksüner, ta

shia linüki jaok.

Osangbener den jembidang Bombay nung tongti putir, Oswald Gracias-i, "Pope-i India kanga semdangner aser pai India indang aiaben jembia aruogo. Pai India semdangra ibaji ajanga tongtepratep aser amalitep jenjang tajungba akümtsü, ta ni bilemer. Ibaji Catholic Arogo, India aser Ato kilonser Modi atema-a tajung asütsü," ta ashi.

Kerala Catholics Bishops' Council-i, Pope-i India semdangba ajanga India nung Khristan aser tanga yimsü amangertem tsungda lenmang lapoktsütsü, ta metetdaksü.

Osangbener den jembidang Odisha nung Arogotem nung tekolak aser Cuttack-Bhubaneswar nung tongi putir, John Barwa-i, asen Ato kilonseri Pope ajuruba atema India nunger Khristantem kanga pelar, ta ashi.

John Barwa-isa, "Atangji tesendaktep tajungba akümtsü. Ato kilonser aser Pope na senden amentsü atema onoki küm aika yongya-a liasü. Tena ajuruteba atema onok kanga pelar aser nüma atanger," ta metetdaksü.

Delhi Catholic Archdiocese nung otongdar, S Shankar-i, Modi aser Pope na senden amenba osangji Khristantem atema dang masü saka India nunger ajak atema osang

tajung, ta ashi.

"Onoki Pope nem India semdangdaksünüa liasü. Pope-i India linük semdangba ajanga tamangba yimsü balala tsungda tesünep nung alitsü atema maongka angutsü, ta onoki amanger," ta paisa metetdaksü.

Iba dak alia India linük tesem ajungalen saisapongertem aser yimten lenirtemia Modi-i Pope ajuruba atema pelaba lemsatepogo.

India nunger Long Jumper, Anju Bobby George-i, "Ato kilonser Modi-i Reverend Pope ajuruba atema pelar. India tasen yangertsü aser nütsung billion ka nükjidong aser taginübatem ataloktsü atema iba ya-a mera ka lir," ta metetdaksü.

India nunger cricket asayar, Robin Aiyuda Uthappa-i, yimjung, tesünep aser yimsü balala tsungda tesendaktep atema ibaji (Pope-Modi senden) mera tajung ka, ta ashi.

Meghalaya Chief Minister, Conrad Sangma-ia, "India aser alima nung Khristantem atema iba ya puti otsü ka kümogo. Tsüngremi tena moajang," ta lemsatep.

BJP otongdar, Tom Vadakkan-i, tena senden amenbaji democratic tanela aser Khristan tamang na nungi lenirtem ajurutepba lir, ta ashi.

## Libya ketdangsertemi Egypt nunger Coptic Khristantem apu

**November 01, 2021:** Tawa Libya nung Egypt nunger Coptic Khristan 17 samaba sülen parnokji kiralongrartemi puer ao astütsüa akok ta bilema liasü, saka parnokji kiralongratemi masü sorkar ketdangsertemi apuba ta jangjaogo, ta Open Doors-i metetdaksü.

September 30, 2021 nü Libya nung Coptic Khristantem samaba sülen nisung aikati parnoka 2015 küm Libya nung ISIS kiralongrartemi Coptic Khristan 21 tekolak tangzuka tepsetba ama tepsettsüa akok, ta bilema liasü.

Open Doors-i Egypt nung

Ministry of Foreign Affairs, Egypt ketdangsertem den jembiba ajanga, Coptic Khristantem ket nung temelaba maliba agi ketdangsertemi apuba liasü ta jangja.

Coptic Khristantemi ozüng alema Libya nung mapa inyaksü aruba liasü.

Temelaba makai ozüng alema linük telungi aitba atema Egypt nunger Muslim aser Khristan ajak senteper 525 pua lir, ta ketdangsertemi metetdaksü.

Tawa Coptic Khristan 17 dang masü saka parnok 40 ketdangsertemi apu; parnoki ozüng alema Turkey linük

ajanga Libya telungi aitba atema apu, ta ketdangsertemi metetdaksü.

Egypt nunger ketdangser kati, tang Libya ketdangsertemi parnok mita reprangdar aser kobi melii chiochtsü aser Egypt-i meyipa yoktsü, ta metetdaksü.

IS teloki December 2014 nungi January 2015 tsungda Libya nung Coptic Khristan 21 apuba sülen 2015 küm February 15 nü Tripoli anasa tzüküm ka nung parnok ajak tekolak tangzuka tepset. Tawa apuba Khristantemia kasa tiaji ajurutsüa akok ta aikati bilema liasü.

## ANOGO ABEN TSÜNGREM DEN

### Balaka Süang

*Saka Danieli pei mulung chubar chiyongtsü tajung mesüra pai yi ajemba agi pa sasa memenentsü ta mulungtet. Daniel 1:8.*

Tsüngremi shibai na aja aser Pa Tanela agi süngdaksü, pai na ajanga mapa tulu inyaksü akok ta nai amanger asü? Tsüngremi na ajaba aser mapang aser na alidak tetsüngdaji nai atongtepdangogo ma? Alima nung tatalokbatemi Tsüngrem aoksadaksütsü makok. Nükjitong ka asoshi na kong lir idakji pai tejangja metetta lidaksür.

Danieli pa mapang nung tatitangbai Kibuba den tesendaktep nung timtem magütsüdaksü. Tsüngrem tsüngdang pa taküm tagizüktettsü südaktsütsü asoshi mapa ajak nung tashi angatsüla ta pai metetta liasü. Alima tashi taitba chubai agütsüba ozüng hau ta meli-i Tsüngremi pa nungi kechi aginer aji chuba ozüng den memeyoktepdaksü.

Khristantem shirnoki Tsüngrem yimli asoshi Tsüngremi parnok lenmang balaka amshitsü ta amang parnok tatishitsü agi otsü sünga lir. Esteri nüburtem kümzüksü asoshi lendong mapang ka nung Tsüngremi Ester chubar obendang yutsü (Ester 4:14). Ejipt nung Pharao yarir tashi taitiba asütsü aser Yakob aser par kibong ayawara nungi kümzüksü asoshi Yosef yutsü (Lipok 41:39,40).

Ne taküm kümzüksü asoshi nai na meketa aliba mapangtem jagi na anishidaksür asü? Mesüra nür putu nung na balaka asütsü asoshi Tsüngrem nükjitong aser tanü ne taküm asoshi Pai mulungba jungkai adoktsütsü Tsüngrem dang asungdangang.

## Early Rain Covenant Arogo nung sayutsüngir ka anema inyaker

**November 01, 2021:** China lenirtem aser züngsemtem kishi kübok Sichuan province nung raksatsüba den külemi Khristan sorkar ketdangsertemi kanga 100 dak tema puogo. Tanü reshikangshiba Early Rain tashi police-i ERCC Arogo Covenant Church (ERCC) züngsemtem anema inyaker, ta nungi sayutsüngir ka aser par China Aid teloki metetdaksü. kibong anema maneni inyaka International Christian Concern regional manager for Southeast Asia, Gina Goh-i, arudar, ta osang ka ajanga "China nung House churches ajak mita oa amokmerener aser lenirtem apur. China ketdangsertemi Arogo lenirtem amokmerenra parnoki tetsübu nung Tenla kitem shibangtsü, ta saakdang kishi nungji 'sentsüh agüjang' ta zülur liasü. teimla nung Arogo lenirtem anema inyaker. Ajisüaka parnok tebilembaji mataloktsü. China nung house churches-i masetshii nokdakba atema pelar. Cultural Revolution nunga parnoki nokdaktet aser Xi (China Tir) mapang nunga parnoki nokdaktettsü," ta metetdaksü.

Taoba Amongnü ((October 24) Chengdu City nung ERCC indang telok 'Tashui' nung lenir, Dai Zhichao aser par kibong mejanga lia nisung kari par kishi nung akoshi, aser parnok saakdang kishi nungji 'sentsüh agüjang' ta zülur liasü.

Anepdang 10:00 ako nung kari par kidang light line katitsü, saka pai community management office den jembiba sülen ghonda tenet lir ang light aru.

Taoba hopta nunga police-i sayutsüngir, Dai aser par kibong ghonda 10 tashi pua liasü.

Pa leniba nung Khristantem tekülem sentong tagidak mapang nung ketdangsertemi aiben timtem agütsüba pai lemsatep.

Tesüiba küm ana tashi sorkar ketdangsertemi züngsem 5,000 aliba Arogo dang Tenla ki shibangang, ta aiben tuyua arur aser Arogo

Tang alima nung Khristantem tamajungba reshikangshiba linük 50 rongnung China ya jenjang 17buba nung lir (Open Doors USA's 2021 World Watch List). Open Doors-i ashiba agi, tang China nung Khristan million 97 dak tema lir aser parnok timbaka ERCC ama register masüba Arogotem nung züngsemtem lir.

**OLONG PAITEP # 5984**

	1		2			3		4		5
6								7		
					8		9			
			10							
11										
13		14		15						16
17								18		

<b>TIPILEN</b>		<b>LANGTSÜNGLEN</b>	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

**OLONG PAITEP # 5983 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



**ALOKBA O WARAKLA NA BALATSÜ ATEMA LAWYER DEN ASÜNGDANGYAR :**

**Alokba** : Sir, ozü tantsü küna ya joko opang mapur, teti raratepa dang alirji joko ojang dang alitsü molungtetogo.

**Lawyer** : Iba atemaji amola Waraklai kechi ashir?

**Warakla** : Aheet aji pai ashiba amajidang ati. Saka joko osettsüset, senotsü, rongsen ajak lemdangjangma, sir.

**Lawyer** : Nüna tanur kwí?

**Alokba** : Küna tanur asem lir.

**Lawyer** : Kechisarna ajak kasa lemdangtsü süra tanur asemji koma lemdangtsü?

**Warakla** : Waa, hauna! Tambu, oda aremzüktepa küm ka külemi ano lir tanur ka asotsü merangdi ni, yongjiang tanur pezüji anana alemtsüato sangküm baladangji.

**Alokba** : Okay no problem!

**Lawyer** : Oh Alok and Warak!!!

Lilir : WhatsApp

**TANÜBO NAI LANGZÜANG**

Q. Koba küm Krish UDAN scheme tenzükja liasü?  
 A. Sept 2021    B. Sept 2020    C. Sept 2019    D. Sept 2018

===== (Taruba adok nung onoki langzüsü)

**YASHI ADOK TELANGZÜBA :** France

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lenet**  
 (v) teka agi tekong nung tashi agi sot ( grasp)  
 \* Sashibai Takuba tekong nung **leneter** kangshi.

**Leniba**  
 (n) len anisang (leadership)  
 \* Marba **leniba** nung telok jangratema anidaker.

**NAI-A YA METETTER MA**

**ALIMA NUNG BILLIONAIRE TIMBA ALIBA YIMTITEM: FORBES 2021**

- BEIJING: 100 billionaires  
 - TOTAL NET WORTH: \$484.3 BILLION  
 - RICHEST RESIDENT: ZHANG YIMING, \$35.6 BILLION
- NEW YORK CITY: 99 billionaires  
 - TOTAL NET WORTH: \$560.5 BILLION  
 - RICHEST RESIDENT: MICHAEL BLOOMBERG, \$59 BILLION
- HONG KONG: 80 billionaires  
 - TOTAL NET WORTH: \$448.4 BILLION  
 - RICHEST RESIDENT: LI KA-SHING, \$33.7 BILLION
- MOSCOW: 79 billionaires  
 - TOTAL NET WORTH: \$420.6 BILLION  
 - RICHEST RESIDENT: ALEXEY MORDASHOV & FAMILY, \$29.1 BILLION
- SHENZHEN: 68 billionaires  
 - TOTAL NET WORTH: \$415.3 BILLION  
 - RICHEST RESIDENT: MA HUATENG, \$65.8 BILLION
- SHANGHAI: 64 billionaires  
 - TOTAL NET WORTH: \$259.6 BILLION  
 - RICHEST RESIDENT: COLIN ZHENG HUANG, \$55.3 BILLION
- LONDON: 63 billionaires  
 - TOTAL NET WORTH: \$316.1 BILLION  
 - RICHEST RESIDENT: LEN BLAVATNIK, \$32 BILLION
- MUMBAI: 48 billionaires  
 - TOTAL NET WORTH: \$265 BILLION  
 - RICHEST RESIDENT: MUKESH AMBANI, \$84.5 BILLION
- SAN FRANCISCO: 48 billionaires  
 - TOTAL NET WORTH: \$190 BILLION  
 - RICHEST RESIDENT: DUSTIN MOSKOVITZ, \$17.8 BILLION
- HANGZHOU: 47 billionaires  
 - TOTAL NET WORTH: \$269.2 BILLION  
 - RICHEST RESIDENT: SHANSHAN ZHONG, \$68.9 BILLION

**SUDOKU # 6025      TELANGZÜBA # 6024**

5			2			6	4	5	9	7	1	2	3	6	8
2			8	3	6	4	5				2	1	7	6	8
	3			4	5		7				6	3	8	9	4
	2	3	7	5	9						5	8	4	1	3
	4			1	3		2	9			3	2	1	4	6
	1			2		4	6	3			7	9	6	5	2
3	9	8	4			1		5			1	7	3	2	5
	6				1			3			9	6	5	8	7
7						9		2			8	4	2	3	9

**OJANG LUTEP # 5571**

JEMBTEIR :

TZNÜKÜ :

NGDA :

NGNUI :

GAANA :

ENEAMR :

TZÜNÜKJANG :

AK :

IAJNG :

TIBSENA :

**OJANG LUTEP TELANGZÜBA # 5570**

TEBILEMBA AJAK PUNGMANG MANGDANG AMA  
 KÜMER JEMBIRA IBAJI TEMETSÜDAKTSÜ LUNG

**TAN HOPTA ATEMA - KOMA SÜLA ?**

Q. Tazünger maliba aser tazüngerterem aliyonga tazüngerterem dang nungi tesayurtemang teimba aliba government school-tembo ajak shibang nunga koma süla ?



November 01, 2021 nü Glasgow, Scotland nung COP26 UN Climate Summit nung British Ato kilonser, Boris Johnson (abelen), India Ato kilonser, Narendra Modi (tiyong) aser UN Secretary-General, Antonio Guterres nung ajurutepdang tangokba noksa nung angur.

### G20 senden nung tongtibang onük aika jembio: PM Modi

Rome/New Delhi, November 01 (Agencies): Ato kilonser, Narendra Modi-i, G20 senden kanga takok ngua agiogo; alima lenirtemi tongtibang onük aika jembio, aser item rongnung wara anema raratsü, health infrastructure tajungba akümtsü aser rongsenketsung tsütsü amalitepa inyaksü onüktem densema liasü, ta metetdaksü. Anogo ananü G-20 senden Amongnü tembangogo; iba senden nung 'Rome Declaration' renema liasü, koba ajanga health sector nung coronavirus immunisation ji alima nung nüburttem atema tajung, ta linüktemi bangjema liasü. Iba senden dak sendakba nung Italy Ato kilonser, Mario Draghi-i, "Iba bangzüng melamela renemogo aser iba senden takok ngua agitetogo.

Testüiba küm ishika tsünga G20 züngsem linüktem longjemer inyakba jenjang mejungi liasü, saka iba senden nung temelenshi ka adokogo; G20 linüktemi longjemer alima wara anema rararet," ta metetdaksü. Draghi-i twitter ajanga, "Italy leniba G20 senden nung onoki international tax inyakyim yanglushi, health kümzüka ayutsü, alima nung kanga sensakertem atema vaccines, külemi rongsenketsung asentenshitsü atema tamendakdak yanglu aser alima nung kanga sensakertem yaritsü atema lenmang tasen angu," ta metetdaksü. India nungi G20 senden nung adener Sherpa Piyush Goyal-i, Covid vaccine emergency use inyakyim atema World Health Organisation tashi itshitsü atema lenirtem bangjem, ta

metetdaksü. G20 senden nung energy aser climate atema tongtibang süa jembio, ta shia Goyal-i, India aser terenlokdak linük aikati terenlokdak lima kümzüka ayutsü atema jembio, ta ashi. "WHO-i benokba nung ajemdaker 2021 küm tatembang tashi nung alima nung nütsung shilem 40 nembosa vaccine agütsütsü aser 2022 küm tom tashi nung nütsung shilem 70 nem vaccine agütsütsü nükjidong ataloktsü atema onoki vaccine aser nungdakba medical osettem supply agütsütsü atema mera agia inyaksü," ta G20 lenirtemi metetdaksü. Tang tashi nung alima nung nisung 246,713,600 dak coronavirus putetogo aser iba tashidak agi shiranger 4,999,900 dak tema süogo.

### Nov. 8 nungi biometric attendance machine amshitsü lemtetogo

New Delhi, Yimpoksü/ November 01 (Agencies): Centre sorkari November 8 nungi tenzüka sorkar mapa inyakerkem biometric attendance agitsü lemtetogo, ta Hombarnü Personnel Ministry-i metetdaksü. "Biometric machines nung saniters ayutsü atema heads of department-i inyaksüla, aser mapa inyaker ajaki 'attendance' atema biometric machine nung mekongshidang aser kongshiba

sülen-a sanitizers amshitsüla," ta Ministry-isa metetdaksü. Yaküm India nunga coronavirus wara prok tenzüka sülen sorkari biometric attendance mamshitsü metetdakja liasü. "Biometric attendance amshidang ajaki tangar dang nungi süklep trokbosa pilar alitsüla. Nungdakra nisung menungteptsü atema biometric attendance machines talila yutsütsü," ta Personnel Ministry-i central government ministries

aser department ajak nem metetdaksü. Mapa inyaker ajaki mapang ajak nung mask agitsüla, akok tashi senden balala aser tesemdangertem den senden-a video conferencing ajanga dang agitsüla," ta kasa sangdong nungsa shia lir. Office nung ketdangsertem aser staff ajaki covid wara dak sendakba tetuyuba ajak shidak benshitsüla, ta Personnel Ministry-isa metetdaksü.

### Tetsür atema temeja manifesto ka renemogo: Priyanka Gandhi

New Delhi, November 01 (Agencies): Hombarnü Congress general secretary, Priyanka Gandhi Vadra-i, taruba Uttar Pradesh Assembly elections atema Congress-i tetsür asoshi temeja manifesto ka renemogo, ta metetdaksü. Priyanka-i Hindi oshi nung twitter ajanga, "Uttar Pradesh nung aianutem, anogo shia nenoki timtem aika ajangshidar. Ibaji angateta Congress party-i tetsürtem atema manifesto temeja ka renemogo," ta metetdaksü. Laisa, state nung party-i takok ngura party-i tetsürtem nem LPG cylinders angati agütsütsü aser sorkar bus nung angati senzüdaktsütsü, ta nangzüka. "Congress party-i sorkar

akümbe sülen tetsür nem küm shia LPG cylinder asemsem angati agütsütsü aser tetsürtemi sorkar bus nung angati senzütettsü," ta lai ashi. Uttar Pradesh nung party in-charge, Prinyaka-isa, lar party-i tetsür candidates nem party ticket shilem 40 agütsütsü, ta taoba ita nangzüka liasü. State nung voters tesadang shibo tetsürtem lir, anungji sorkar nung tetsür nem tashi tulu agütsütsü nükjidong nung party-i tetsür nem ticket shilem 40 agütsütsü lemtet. Laisa, ASHA aser Anganwadi nung inyakerkem nem ita shia sen 10,000 agütsütsü, tetsürtem nem sorkar mapa shilem 40 agütsütsü, tantsür amitsür nem ita shia

pension sen 1,000 agütsütsü aser state tesem balala nung skill school 75 lapoktsütsü aser item school nungjaji state nung tasü tait tetsürtem nungtem nung ajatsü, ta metetdaksü. Uttar Pradesh nung Congress party jenjang junga mali ibayongji Priyanka Gandhi-i tetsürtem vote angutsü nükjidong nung election nüboyim sentongtem nung tetsürtem atema kanga jembia arudar aser aika nangzükdar. Taoba ita nunga Congress general secretary-i, state nung class 12 pass ser alir tetsür shia nem smartphone kaka agütsütsü aser graduate ser alir tetsür shia nem electric scooter kaka agütsütsü, ta nangzüka liasü.

### MULUNGNEN O

**ASO:** 18/4/1952 **ASÜ:** 27/10/2021

**Asür R. Asangla (Wameken)**

Onoki teti meima aliba Ojala R. Asangla, shiranga aliba mapang nungi tasünü tashi kidang-kiyonger, medemer, yimtsür yimer aser anük-apang kwikati rongsen, nübu aser tamang sarasadem agi ozü den yaritepogo, nenok ajak dang kangasa pelaba lemsateper. Tsüngremi nenok mapa tajung asoshi maneni mojangma ta onok sarasadem.

*Temeim Chirnur, semchirtem aser kinungertem*

### MULUNGNEN O

**TEBUI ASHI KOKA LEMANGI NA AOTSU AJI NI NU DANG ASHITSÜ ASER SAYUTSÜ. T. KEN 32:8**

Onok taküm jenjang yanglutsüsang Temeim asür **IMSUMAR PONGEN** (Chuchuyimlang) Pa mapang tatsüka Shiranger 22.10.21 anogo nung iba akümüli nungi pila orr onok mangyim jashi mapang kija, kibong, Arogo aser Lokti tentet balala kwi kati, Ali rongsen, nubuo aser shisatsü den Sarasadem agi yariogo, nenok ajak dang Ozü kibongi pelaba lemsateper. Nenok dangi tsüngdong arua pelaba meshitetba atema sasar. Saka nenok mapa tajung onoki teti bilemtetsü. Tsüngremi nenok mapa tajung asoshi mojang ta ozü tamang Sarasadem.

**ASOBA: 30.03.1961**  
**ASUBA: 22.10.2021**

*Temeim Kinungtsü, Chirnur, kinunger & Anükapang*

### OFFICE OF THE YAONGYIMSEN TETSÜR TELONGJEM

Date : November 01, 2021.

**ABAM & NBCC DANG TEMEPISHIBA KA**

Nagatsür aser North East India nung pioneer Rev.Dr.Noksangchila (Yaongyimsen), la 1988 küm January ita nungi 2002 küm tashi CMCH Vellore nung Chaplain inyaka arudang, Naga nung treatment-i arurtem tanendak maka timtemba ngua ali kimong ka alir tanendak ki ka yanglutsü asoshi, kenü amongnü ka külem lisemer tsürabur aser lenirtem den yangji treatment-i arurtem jatepa parnok chapel hall nung sarasadem mapang tajung ka agir, temulungertem rongnung tenla sarua tenzüka. Iba sarasademji Tsüngremi langzüa 2001 kümbo Nagaland Baptist Church Council (NBCC) tenung nung ali tilaka, tasazük nung, 60 ft x 30 ft alia toktsü ta tsürabur ajanga angazüker. Ajsüaka, tang tashi iba kimong nungji ki yanglua maliba osang angashia temulung animesüngzüktetter. Anungji, ABAM aser NBCC dang la akümüli nung ya alidangsa, iba sentongji mapa küma inyakdaksüner ta mepishia metetdaksür.

**Sd/- AKANGMENLA** President, YTT. **Sd/- T.ASENLA IMSONG** General Secretary, YTT.

November 01, 2021 nü New Delhi nung Union Minister of Youth Affairs & Sports, Anurag Thakur-i (abelen nungi tasembuba) 2020 National Sports Awards angurtem den tangokba noksa nung angur.



Totzü agi anüngba mapang Port-au-Prince, Haiti nung aliba gas station ka nung nüburtem pei indang motorcycle nung totzü inoktsü adenshia aliba mapang tangokba noksa nung angur.

### Pakistan sorkar aser TLP tangatettep ka dangi aruogo

**Islamabad, Yimpoksüi/ November 01 (Agencies):** Tehreek-e-Labbaik Pakistan (TLP)-i tawa Pakistan kübok tesem balala nung parnok tekolakba Saad Rizvi chiochtsü aser French ambassador mintoktsü khanga longkak aita aruba sülen Deobarnü sorkar den tangatettep ka dangi aruogo. Parnoki longkak aitba sentong anentsü aser Islamabad-i longkak aita aotsü sentong aliba aginogo.

TLP lenirtem aser Imran Khan-i aniba sorkar kübok committee ka tsünga sensak asema sülen iba tangatettep dangi aru, ajisüaka telok anapronglai sensaksem dak sendakba nung osang tejangja agütsütsü memulungi liasü.

Osangbenertem den sensaksemba mapang

tamangba yimsü tsütsü scholar Mufti Muneeb-i, sensaksem ya kati ka dak tamang katapa kaogo, ta ashi. Paisa, "Pakistan sorkar aser TLP na tatongi sensaksemogo aser telok ana tsünga tangatettep ka dangi aruogo. Ajisüaka osang tejangja mapang tapet ka nung sangdongtsü," ta ashi.

Media dang iba osang tajungleni sangdongtsü mepeshiba den paisa, TLP tekolakba Rizvi, shiba April 12 nü pua liasü, paia iba tenangzüktepa ya agizükogo ta ashi. "Iba ken o benoka inyaksü atema committee ka tentettsü. State minister for parliamentary affairs Ali Muhammad Khan, iba committee tekolak asütsü aser Punjab law minister Raja Basharat-a züngsem ka asütsü.

Tehreek telok nungi Mufti Ghulam Ghous Baghdadi aser Hafeezullah Alavi nati iba committee nung shilem agitsü," ta Mureeb-i ashi.

Pakistan indang foreign minister Shah Mehmood Qureshi, National Assembly Speaker Asad Qaiser nati anir sorkar tenüng nung lenir 12 iba sensaksem nung shilem agi aser kasa mapang nung TLP nungi Mufti Ghulam Abbas Faizi aser Mufti Mohammed Ameer aser tangartemi shilem agia liasü.

Taküm April ita TLP-i anir Pakistan ajunga nung longkak aitba sülen tang agi tanabenbuba parnoki longkak aitba sentong ayongzuka agiogo. Longkak aitba sentong anaprongla nung police tem den mangatettep adok aser nisung takümdena laluogo.

### Ethiopia nung Tigray sepaitemi Kombolcha jila agiogo

**Addis Ababa, Yimpoksüi/ Nov. 01 (Agencies):** Tigray sepaitemi Ethiopia indang Amhara region nung ano tongtipang jila ka agiogo, ta Deobarnü ashi.

Sepaitemi Kambolcha aser iba indang airport atsüngdokogo, ta Tigray People's Liberation Front (TPLF) indang odongtar Getachew Reda-i ashi.

Amhara region nungi Tigraya nung tashi ajema kumdaktsütsü merangba Ethiopia mitkar aser par tembartem den raraba Tigraya sepaitemi Kombolcha atsüngdokba ya tajangzük tulu asütsü.

Iba jila tulu ya linük yimtiba, Addis Ababa nungi kilometre 380 shi pilar lir. TPLF ya Ethiopia yimtiba anasai aor, ta ashir.

Tigrayan sepaitemi Kombolcha agiogo ta sangdongba sülen Ato Kilonser Abiy Ahmed-i nüburtem dang TPLF anema raraba nung shilem agitsü ayongzük. Kombolcha ya linük yimtiba aser Djibouti rongnendak tesem

sendaktepba lenmang nung lir. "TPLF kiralongrartem nungi kumzuka alitsü, meyipa yoktsü aser tepsettsü atema asen nüburtemi nok-o-nü akabatam amer nokdaktsüla," ta Abiy-i Facebook nung ashi.

Dessie yimti nunga asendenshir khateper, kong Ethiopia sepaitemi nüburtem dang kilung nung alitsü totuyuba agütsü, ta ashir. TPLF ajanga Dessie ya Deobarnü agiogo, ta Getachew-i shia liasü.

TPLF temi linük north tsütsü tongtipang jila ana agiogo ta jembiba ya sorkar indang odongtar Legesse Tulu-ibo magizük aser yangji sepaitemi tang tashi rarar, ta ashi.

"Tang Dessie aser Kombolcha nung kanga sashia khatepba mapang lir," ta Legesse-i osangbener senden ka nung ashi.

Ethiopia north tsütsü timba nung osangtsüsang magiteter aser osangbener marudaktsür, anungji tongpang akokba indang osangbener temi mejangjateter. Addis Ababa nungi north tsütsü kilometre 400 shi pilar

Dessie nung mitkartem raratsü renemshia lir, ta yangji alirtemi shia liasü aser ano linük north tsütsü jila balala nung raraba nungi jena arur civilian tem iba yimti nungya jenoka liasü.

Dessie nung rara tenzük dang nisung aika bus tem nung nungtepa mener Kombolcha bushia Honibarnü ao. Saka Deobarnü iba jila nunga rara tenzuka liasü.

Nisung lokti tepsetba, aika tashiyim amshia shi nung medemba aser humanitarian crisis ajurua aliba Tigray nung taoba küm November ita Ato Kilonser Abiy Ahmed-i sepai yokba sülen rara ya tenzuka liasü.

2019 Nobel Peace Prize angusang Ahmed-i ashiba agi, iba region nung yimsü asüba TPLF temi army camp tem nung amakba ajanga telangzuba agüja iba operation ya tenzük.

Pai tekeratiba nung takok angutsü nangzük, saka June ita tatemlen tashinung Tigray tesem timba sorkar anemertemi tanaben agir liasü aser ano anasa aloba Amhara aser Afar region tashinung rara

### Chuba yimli aser sorkar nung temelenshi atema Thailand nung longkak aiter

**Bangkok, Yimpoksüi/Nov. 01 (Agencies):** Thailand chuba yimli aser mitkari aniba sorkar nung temelenshi lidaktsütsü atema longkak aiter ano maneni Bangkok yimti-yimtong nung adenshir.

Nisung meyrirjang aika adenshia Deobarnü longkak aitba ya tawa longkak aitba rongnung tulutiba alitsü.

Lokti tila adenshia longkak aitba yabo mapang shia ajangshia arur, talisa Bangkok kübok Din Daeng tesem nungbo teti amai longkak aita karbok police den raratepa liasü.

Iba amai longkak aitba mapang tanur ka dak August ita tekolak nung akha aser pa ita ana coma nung lir taoba hopta asü.

Deobarnü longkak aitba ya talisa Section 112 agientsü atema liasü, koba agi chuba aitsür merenshitsu shia lir.

Mapang kabo chuba yimli nung temelenshi atema ola adoktsü ya meshi amai liasü, saka longkak aiter lanurtem parnok taginüba akhangba nung temolung tuluba akumer.

Longkak aitdak nisung ka Squid Game indang süoshi semer yimtong nung sign ka amer jaja liasü, kong "112 agienang. Tetsübu agienang. Telemsa agienang. Teimla makaba agienang," ta zülua liasü.

Deobarnü longkak maitdang People's Revolutionary Alliance (PRA) ta nungja agütsür aliba telok ka nung lenir kati ashiba agi, longkak aiter telok balala longjemtsü atema activist temi lenmang balala bushir.

Hopta tatemlen longkak aitba ya yimsüsür mezüngmeshiba temerenshi agientsü, vaccine shidak lemsatsü aser longkak aiter telok balala longjemtsü merangba lir, ta pai ashi.

Thailand nung tang aliba ozüng kübok longkak aitertem ya kiralongrar ta sangdonger aser Section 113 kübok parnoki sorkar atsüngdoktsü merang, ta aitsür.

Ajisüaka Deobarnü longkak aitba nung itemji khuret kangabo meliasü, kechiaser activist telok balala aser tanur-tain ajaki shilem agia liasü.

### Japan PM Kishida-i election akokba osang sangdongogo



**Tokyo, Yimpoksüi/ November 01 (Agencies):** Japan Ato Kilonser Fumio Kishida-i Hombarnü par teloki national elections akokba sangdongogo. Pai aniba ruling coalition-i election nung menden timba kokteta liasü.

Mapang talangka Japan yimsü süa aruba Liberal Democratic Party (LDP) aser parnok den longjemer aliba Komeito party-i parliament indang lower house nung menden 465 aliba nungi menden 293 kokogo, ta official osang sangdongba sülen local media sangdong balala ajanga sangdonga liasü.

"Election kanga sütepa toktepogo, saka nüburtemi mulungba nung aotsü aser LDP-Komeito sorkar kübok Kishida lenisüba nung parnoki

onok nem linük tarutsü yangerdaktsüner," ta pai ashi.

"Onoki LDP atema senti menden 261 koktetogo. Khuret angatetba party ka ama onoki nüburtem tejangraba ataloktsütsü," ta Kishida-i ashi, shibai Ato Kilonser mapa ita ka shi tejak dang agizüka liasü.

Japan nung election osang sangdongba sülen benchmark Nikkei stock index shilem ana agi timba aküm aser iba ajanga linük yimsü asüba sorkar nem wara pokteter aliba atema aser defence dak sendakba nung bill benoka inyaksangshitsu atema lenmang sadema lapoktsütsü.

Taoba mapang iba coalition sorkar yagi parliament nung menden 305 koker liasü aser LDP kijaia menden 276 koker liasü.

## Peren nung ASHA atema training ka ayongzük

**Peren, Yimpoksüi/ November 01, 2021 (Agencies):** Peren district kübok, October 27 nungi 29, 2021 tashi Aapke Dwar-Ayushman nung block level ASHA training ayonga agiogo, ta sangdong ajanga metetdaksü.

"Aapke Dwar- Ayushman" ya nükjiding asem yur tenzükba mapatong ka asütsü. Iba scheme nung, 'awareness' sentong tajungba melenshütsü, e-card maparen timba kümshütsü aser 'continuum of care' tenzüktsü asoshi maparen densema lir, koba ajanga iba scheme kübok item ya mapa kuma inyaktüsü asoshi lenmang lapoktsür.

Iba training nung ASHA dang iba scheme indang awareness aser scheme kübok maparen tajungba melenshia inyaktüsü, awareness drive atema asalentongtem, AYUSHMAN cards aser züngoksema aliba kibong shilem aser atakzükja/latetta aliba inyakyimtem asadangshitsü indang tesayuba agütsüogo.

ASHA dang service balala agitsü aser külem sendaktepa alir tentetem nungi BIS team aser operator tem den longjemmer inyaktüsü asoshi metetdakja liasü.

ASHA aser Health Care Workers temi Village Council den longjemmer temsüa alir kilen tem jangjatetsü asoshi maparen tenzüktsü. Jangjatetba kilen shia atema ASHA nem incentive agütsütsü.

Aapke Dwar-Ayushman nung training agiba mapang, tajangzük angutsüpurtem züngoktsü aser e-card yanglutsü

atema ayongdentsüla asoshi ASHA pur ajungshia liasü.

Verification inyakyim temer sülen, District Implementation Unit (AB-PMJAY) den BIS Operator aser Village Council longjemmer tajangzük angutsüpurtem, shirkok temsüa lir, parnok atema e-card yanglutsütsü asoshi maparen tenzüktsü.

Iba training sentong nung shisalen sayurji District Community Mobilizer aser ASHA Co-Ordinator tem liasü.

Ahthibung, Jalukie aser Tening block tem nungi ASHA 122 agi iba training nung shilem agiogo, ta kasa sangdong ajanga metetdaksü.

## Dimapur nung KFC restaurant tanabuba lapokogo



**Dimapur, Yimpoksüi/ November 01, 2021 (TYO):** Hombarnü, Business Association of Nagas (BAN) president, L Mongkum Jamir-i Nagarjan lenjem nung Dimapur indang KFC restaurant tanabuba lapoktsüogo, ta sangdong ajanga metetdaksü.

Iba restaurant lapokba sentong nung, Jamir-i, Zaphu

Nagi ama local entrepreneur kati alima ajungai jangjaa aliba nungtugu brand - KFC lapoktetba angudang jangratemer aser pai inyakba mapa ya entrepreneur aika atema tatishitsü asütsü, ta ashi.

Entrepreneurship agitsü asoshi lanurtem ajungshitsüla, kechiyong rongsenketzung renloktsü atema iba ya dang

lenmang lir, ta pai shisem.

BAN president, Jamir-isa, staff ajak, shirkok timbaka lanurtem lir, parnok dang tajungtuba nung nübur tenzüktsü aser pei maparen nümatanga inyaktüsü asoshi ajungshio.

Proprietor ZaphuNagi-i telok pelaa agizük aser iba shishilemba maparen tenzükba indang tongmelang agi telok dang metetdaksü.

Kuda Village Baptist Church, Pastor, NikolieNagi-i iba KFC restaurant tasen meshiteta sarasademtsü. Iba restaurant lapokba sentong nung BAN indang General Secretary, Dr. Yan Murry aser Joint Secretary BAN, Maj. (Retd) Vikuti Asumi nung denogo, ta kasa sangdong nung shia lir.

### AO SENSO TELONGJEM GUWAHATI

#### PLATINUM JUBILEE (1946 -2021)



OMEN :

*Telongjem Nung Tejakleni*

**TONGTI TEJAOEKER:**

Mr. Limasünep Jamir, IPS  
IGP (Range) Kohima, Nagaland

ANOGO : 4th November 2021  
MAPANG : 10 am to 12 noon  
TESENTEPDAK : Shilpgram, Panjabari

#### SENTONG

- Menden : Miss. Lipoksenla
- Sarasademtsü : Rev. Prof. Akheto Sema, General Secretary, CBCNEI, Panbazar, Guwahati
- Telok Ken : Kü Linük Ne Meyong
- Asür bilemtetba : Rev. Aowabang, Pastor ABCG
- Tarur pela-a agizükba : Mr. Temsüzulu, President ASTG
- Tepela O : Mr. Lanunochit Ningdangri (Grandson of Late Imnameren)
- Jubilee nüngo kaket saya : Mr. M. Talimoa, Convenor
- Kija-i atenba ken : Mr. Moainba
- Tayongzükba O : Rev. Puna Ao
- Temeja ken ka : ABCG Youth Ministry
- Onük : "Telongjem nung Tejakleni"  
Tejembir, Tongti tejaoker : Mr. Limasünep Jamir, IPS  
IGP (Range), Kohima, Nagaland
- Melepzüng O : Rev. Toshirenba, Convenor  
Planning Committee
- Tatem Sarasadem : Mrs. Anungla Imchen

**Jubilee Benjong Chiyongba mapang  
(Jubilee Feast)  
12:30 pm to 1:30 pm**

- Iba sentong nung Guwahati nung alir Aor Kija, Kibong, Anükapang aser ano Guwahati nung lir aor ajak arua atentsü pelashishia jaoker.
- Iba sentong nung tsüngdong arua medentettertema Zoom ajanga adentsü asoshi Zoom ID : 898 3049 8217 aser Passcode : 923718 agütsür.

### AO KAKETSHIR TELONGJEM GUWAHATI

#### PLATINUM JUBILEE (1946 -2021)



OMEN :

*Linük Asoshi (For The Nation)*

**SENTONG MERAKETTSÜR :**

Dr. Longrineken Ao  
Advisor

National Highway Treasuries  
& Accounts Govt. of Nagaland

**TONGTI O JEMBIR:**

Mr. Tongpok Pongener

Advocate, Gauhati High Court, Kohima Bench, Nagaland

ANOGO : 4TH NOVEMBER 2021 MAPANG : 02 PM TO 04 PM  
TESENTEPDAK : SHILPGRAM, PANJABARI

#### SENTONG

Pianist : Suneper Aier

#### Sentong Lapokba aser Jubilee Sangro

- Sentong Ketdangsür (Compere) : Mr. Sangyu & Miss Ariben
- Telok Ken : Tsüngrem Dang Sentsüwangshi
- Sarasademtsü : Mr. Lanu Wallinger
- Asür bilemtetba : Rev. Temjen Lkr
- Tarur pela-a agizükba : Mr. Temsünungsang Pongen  
President, AKTG
- Sentong Meraketsür O : Dr. Longrineken  
Advisor  
National Highway, Treasuries & Accounts  
Govt. of Nagaland
- Temeja ken : AKTG
- Greetings : President, NSUG
- Jubilee nüngo kaket saya : Mr. M. Talimoa, Convenor
- Tongti O Jembir : Mr. Tongpok Pongener  
Advocate, Gauhati High Court  
(Kohima Bench) Nagaland
- Onük : "Teyakyak alizung tongtetba  
lanur ka".
- Melepzüng O : Rev. Toshirenba  
Convenor Planning Committee
- Sarasademtsü : Mr. Tiatemtsü, Treasurer AKTG

- Iba sentong nung Guwahati nung alir Aor Kija, Kibong, Anükapang aser Guwahati nung zünger aor ajak atentsü pelashishia jaoker.
- Iba sentong nung tsüngdong arua medentetaka Zoom ID: 849 3000 6820 aser Passcode : 118455 ajanga sentong tagidak nung arua adentsü akoktsü.

## Security Forces-i

## Dimapur nung yi apu

**Dimapur, Yimpoksüi/ November 01, 2021 (TYO):** Security Forces den Police longjemmer Hokolbarnü (29.10.2021) general area, Burma Camp mita aoba mapang ozüng alema yi shibelener nisung ana apu aser yi shibelener maparen puteta/nokdangteta liasü, ta sangdong ajanga metetdaksü.

Osang tejangja ka nung ajemdaker, Security Forces den Police longjemmer general area Burma Camp mita aoba mapang, yi shibelener ana apu aser sen 8,25,500 alang IMFL den sen 31,160/- ngutet.

Iba maparen dak sendakba nung maneni bushisingdangtsü atema pua alir anaprongla den team-i ngutetba IMFL aser sen ajak East Police Station, Dimapur nung agütsüogo, ta kasa sangdong nung shia lir.

## Nagaland tetsür team-i Sikkim kokogo



**Dimapur, Yimpoksüi/November 1 (TYO):** Eden Garden, Kolkata nung tang asayaa aliba Women's Senior One Day Tournament nung Nagaland team-i Sikkim madak takok nguogo. Anogo ka tejakdang Jammu & Kashmir makokba sülen parnoki tanü asaya kanga junga kokogo.

Tanü asaya nung toss akokba sülen Sikkim team-i mezüing bat asütsü shim aser over 48.2 nung asayar ajak out ser run 159 yanglu. Sikkim-i asaya kanga junga tenzük aser asaya mezüingbuba shilem tashi nung asayar asem out ser parnoki run 80 yanglur liasü, ajisüaka Limatola Jamir-

i (7-1-20-2) ball kanga junga ona parnok nokdanga liasü.

Lai ball kanga junga aonba ajanga Sikkim team run kaka dang agitsüsa aküm aser iba mapang nung asayar ana tashi run out asü aser iba den lai ano asayar ana out sütsü. Sikkim team nungi Jetsung-i run 51 yanglu aser la den yarisema Rinki-ia run 32 yanglu. Nagaland team bowler tem rognungi Limatola dak alia Gautami, Elina Muru aser Kiran nungeri wicket kaka agi.

Asaya tanabuba shilem nung Nagaland team-i over 41.2 nung asayar 5 out ser Sikkim-i yanglua aliba run menepa run 162 yanglu.

Parnoki iba asaya wicket 5 agi akok. Nagaland team nung asayartem rongnungi Poonam-i ball 102 nung out mesüi run 91 yanglu aser Gautami-i run 20 yanglu. Ajisüaka ajak dang partnership tajungtibaji Elina Muru aser Poonam na tsüingda liasü. Tena senteper run 60 yanglua liasü. Elina-i run 10 dang yanglu saka lai ball 54 tashi out mesüi asaya. Sikkim atema Tabita-i wicket 2 agi aser Pranita, Purni aser Anjeel nungeri wicket kaka agi.

Nagaland team taruba asaya Meghalaya den November 3 nü Eden Garden, Kolkata nung asayatsü.

## Tottenham-i manager Nuno mapa nungi anentsüogo

**Yimpoksüi/November 1, 2021 (Agencies):** Tottenham Hotspur-i manger Nuno Espirito Santo mapa nungi anentsüogo, ta Premier League club yagi Hombarnü metetdaksü. Honibar aonung goal 3-0 agi kidang Manchester United makokba sülen pa mapa nungi anentsüogo.

August ita Premier League tenzükba sülen Spurs puri mezüingbuba asem koka parnok temaba jenjang nung liasü, saka parnok pongubenbuba tamakok anguba sülen tang temaba jenjang nung aliba Chelsea team dang nungi point 10 agi tajemba lir.

Kasa mapang nung Nuno indang coaching staff tema mapa nungi anentsüogo. Club-i tang tashi pa melentsüpur sangdonga mali.

"Nuno aser pa indang coaching staff temi kanga dang takok ngunüba ni meteta lir aser iba telemtetba agiba atema kanga sasaa bilmemer," ta Spurs' managing director of football Fabio Paratici-i ashi.

"Nuno ya chichiba gentleman ka aser idaki pa teti pelashishia agizüksü. Onoki pa aser pa indang coaching staff tem dang kanga pelar aser tarutsü nung takok nguyonga

aotsü imlaja atar," ta paisa ashi. Wolverhampton Wanderers nung season pezü tashi kanga takok ngua team aniba sülen Nuno ya Jose Mourinho melena shim. Pa den küm ana atema tenanzüktepba yanglur liasü.

Iba season mezüingbuba asaya nung pai aniba team-i champions Manchester City koka tenzük, ajisüaka London derbies pezü tashi nung tamakok anguba sülen team jenjang mejungi aküm.

United den asayaba mapang target nung khen danga ball memetsüdangi asaya goal 3-0 agi makokba sülen fan temi Nuno kanga mejungi aitsü aser "nia kechi inyaker memetet," ta ayima liasü.

2019 küm Champions League finalists Spurs pur ya taküm UEFA indang third-tier tetoktepba; Europa Conference League nunga junga masayateti arudar.

Parnok par telok nung Rennes aser Vitesse Arnhem sülen tasembuba jenjang nung lir aser asaya asem nung parnoki asaya ka dang koka lir. Parnok Brest-i Vitesse den asayatsü.

Anett Kontaveit-i Transylvania Open kokogo Cluj-Napoca, Yimpoksüi/

November 1 (Agencies): Deobarnü Transylvania Open final asaya nung Anett Kontaveit-i top seeded asayar Simona Halep kokogo. Iba asaya akokba sülen la season-ending WTA Finals nung taküm mezüingbuba asayatsü atema maongka ngutetogo.

Final asaya nung Estonian tsürula yagi 6-2, 6-3 agi Halep madak takok ngua liasü. 2021 küm tang agi lai asayamung pezübuba koktetogo aser asayamung pezüprongla ya lai taoba hopta 10 tsüingda kokteta liasü.

Maneni Kontaveit ya Estonia tsürtem rongnung season-ending WTA Finals nung asayaba mezüingbuba asayar akümtsü aser Hombarnü sayaba tetsür asayartem rankings nung la jenjang tibubai tuogo.

Cleveland, Ostrava aser Moscow nung asayamungtem akokba sülen lai Deobarnü iba asayamung koktetogo.

Taoba asaya 28 nungi 26 akokba sülen taruba ita Guadalajara nung WTA Finals nung Aryna Sabalenka, Barbora Krejčíková, Karolina Plisková, Maria Sakkari, Iga Świątek, Garbine Muguruza aser Paula Badosa nunger den Kontaveit asayatsü.

## Srikanth & Sen nati anir India team HYLO Open nung asayatsü

**Yimpoksüi/November 1, 2021 (Agencies):** Kidambi Srikanth aser Lakshya Sen nati anir India nung asayartem HYLO Open Super 500 badminton tournament nung shilem agitsü. Iba asayamung ya Mongolbarnü tenzüksü.

Sixth seeded Srikanth-i taoba hopta pa indang asaya yimya tajungba akümba sayuogo. Pa French Open tanabuba round nung Japan nung asayar Kento Momota-i tsükdaksü, saka taoba mapang dang nungi tajungba asayaba nguogo.

Iba asaya decider nung Srikanth point ana agi timba liasü saka aibelen kar menaba ajanga asaya makok. HYLO Open nung pa Japan nung asayar Koki Watanabe den asayaa tenzüksü. World no 22 Lakshya Denmark Open aser French Open nung kanga junga asayaogo aser pa asayamung ana nung ya tanabuba round aser quarterfinal nung tsüka liasü. Pa iba asayamung mezüingbuba asaya nung France nung Thomas Rouxel den asayatsü.

Arishi küm 20 tain asayar ya taoba küm iba asayamung nung

tebu aser coach DK Sen dak COVID-19 tashidak potetba ajanga tembanga masayatetsüsa aküm.

Kasa mapang nung Sameer Verma-a taoba hopta ana tsüingda asayamung ana nung last 16 aser quarter tonga asayaogo, ajisüaka asayamung anaprongla nung pa yiruba ajanga tembanga masayatet.

Dhar nungi arishi küm 27 tain asayar ya iba asayamung nung Thailand nung asayar Kunlavut Vitidsarn den asayaa tenzüksü, ajisüaka pa temang agi koktetsü mekoktetsü aji mejangjai lir.

Kasa mapang nung India nung kija asayartem rongnung Subhankar Dey, Korea nung asayar Lee Dong Keun den asayatsü, HS Prannoy Ireland nung asayar Nhat Nguyen den asayatsü aser Sourabh Verma Germany nung asayar Max Weisskirchen den asayatsü.

Tebur tarep asayar B Sumeeth Reddy aser Manu Attri na aser tetsür tarep asayar Ashwini Ponnappa aser N Sikki Reddy nungera iba asayamung nung shilem agitsü.

## Wrestling asayamung Nagaland team-i medal 20 angu

**Kohima, Yimpoksüi/November 1 (TYO):** Tawa tembanga 9buba National Traditional Wrestling & Pankration Championship 2021 nung Nagaland Wrestling Association (NWA)-i medal 20 (10 Gold, 7 Silver aser 3 Bronze) koktetogo. Iba asayamung ya Goa nung October 30 aser 31 nü asayaa liasü.

Iba asayamung nung NWA Technical Secretary Mitwatei Hebwang aser Women Coordinator Kudukholu D. Vadeo na Nagaland team official supervisor aser

Keduovilie Zumu, Team Coach liasü. Maneni Referee ama Surhoneyi Soho-i belt wrestling achayanga liasü. Iba asayamung nung takokertem taruba International Championship nung India tenüing nungi asayatsü imlar.

Nagaland team October 23 nü Goa-i apusoa ao aser November 5 nü train ajanga Dimapur tonga arutsü imlar.

NWA tir Dr. Hiabe Zeliang-i sangdong ka ajanga ashiba agi, wrestler aser ketdangsurtem agizükba sentong ka NWA-i ayongzüka Kohima nung agitsü.

### NWA team nungi takok angurtem:

A. BELT WRESTLING (tebur)			
Sl	Category	Name of Winner	Position
01	100+ Kg	Keduovilie Zumu	Gold
		Surhoneyi Soho	Silver
02	85+ Kg	Venuzo Dawhuo	Gold
		Mezhüvil Kiso	Silver
03	85 Kg Below	Kevizhakho Suokhrie	Gold
		Vekutho Soho	Silver
04	76 Kg Below	Seyiejalie Gwirie	Gold
		Keneiselie Khawakhrie	Silver
		Thechamo Murry	Bronze
05	65 Kg Below	Vevotso Lase	Gold
		Rokokehie Khawakhrie	Silver
06	59 Kg Below	Rokovotuo Khawakhrie	Gold
		Vizose-u Metha	Silver
		Itingchi	Bronze
07	54 Kg Below	Kütho Luruo	Gold
08	49 Kg Below	Bongtang Phom	Gold
B. BELT WRESTLING (WOMEN)			
01	56 Kg Below	Vekhonieli Curhah	Silver
C. MAS WRESTLING (MEN)			
01	49 Kg Below	Bongtang Phom	Gold
02	100+ Kg	Keduovilie Zumu	Bronze
D. MAS WRESTLING (WOMEN)			
01	56 Kg Below	Vekhonieli Curhah	Gold

## BILEM DANGANG

"Anogoshia ya asenok atema mapa tajung inyaktsü anogo ka südaktsütsüla."